

09/05/2003

Globalisasi: Rakyat tidak boleh jadi penonton pasif

BINTULU: Rakyat negara ini tidak lagi boleh menjadi penonton pasif terhadap perubahan di era globalisasi kerana tindakan itu mungkin menghalang generasi akan datang daripada menikmati masa depan yang baik, kata Datuk Seri Dr Mahathir Mohamad.

Perdana Menteri berkata, mereka sebaliknya perlu bekerjasama untuk mempertingkatkan daya saing negara dalam industri minyak bagi menghadapi cabaran mendatang, terutama dalam rangkaian perniagaan gas asli cecair (LNG).

"Kita tidak boleh menjadi penonton yang pasif terhadap zaman yang berubah ini kerana di dalam dunia globalisasi, ganjaran untuk tidak berbuat apa-apa mungkin bermakna menafikan generasi akan datang kepada masa depan yang baik," katanya berucap merasmikan Kompleks Bersepadu Petronas di sini semalam.

Hadir sama, Pengerusi Petronas, Tan Sri Azizan Zainul Abidin serta Presiden dan Ketua Pegawai Eksekutif Petronas, Tan Sri Hassan Marican.

Dr Mahathir berkata, sementara Malaysia boleh berbangga terhadap kemajuan yang dibuatnya dalam industri minyak dan gas, masih banyak yang perlu dipelajari dan dilakukan.

"Kita tidak mampu untuk mudah berpuas hati. Kita tahu bahawa syarikat-syarikat besar tidak kekal menjadi besar selamanya. Banyak yang telah jatuh, banyak nama besar telah lenyap.

"Rizab kita bukanlah tidak boleh habis, malahan ia agak terhad.

Industri

ini tidak akan bersama kita selama-lamanya tetapi kemahiran dan kepakaran

yang kita peroleh sementara kita masih mempunyai industri ini akan berakhir lebih lama kerana pengetahuan dan pengalaman diturunkan kepada institusi pengajian tinggi dan melalui penggunaan dalam bidang lain," katanya.

Perdana Menteri berkata, walaupun eksport LNG menyumbang 3.6 peratus daripada keseluruhan eksport Malaysia tahun lalu, nilai eksport LNG saja berjumlah RM12.8 bilion.

LNG juga, katanya, telah menjana hasil untuk kerajaan dalam cara lain seperti pembayaran cukai korporat dan lainnya.

"Ini kerana ia tidak cuma terbatas kepada perniagaan minyak dan gas tetapi termasuk perniagaan lain yang muncul daripada keperluan untuk menyokong industri itu serta perdagangan dan perindustrian domestik biasa.

"Saya gembira mendapat tahu beberapa syarikat Malaysia, termasuk syarikat Bumiputera kini terbabit secara langsung dan tidak langsung dalam

menyelenggara loji di Bintulu dan kilang-kilang lain di seluruh

Malaysia,"

katanya.

Dr Mahathir berkata, sejak kargo LNG pertama Malaysia dilepaskan di Bintulu pada Januari 1983, negara bukan saja muncul sebagai pengendali yang berwibawa dan cekap kerana ia tidak pernah terlepas walaupun satu kargo, tetapi telah juga menyamai kedudukan pengeluar LNG terbesar

dunia.

Bagaimanapun, katanya, pulangan terbesar daripada projek LNG ialah perubahan dalam pemikiran pengurus dan pekerja Malaysia.

"Kita tidak lagi merasa tidak yakin. Mereka (pengurus dan pekerja Malaysia) kini tahu bahawa mereka boleh buat apa yang orang lain boleh lakukan. Tanpa terlampau tergesa-gesa, mereka telah mempelajari kemahiran dan memperoleh keyakinan untuk membantu membina dan mengendalikan kompleks loji gas ini.

"Ia bukanlah satu pencapaian mudah dalam tempoh yang agak singkat. Saya

gembira menyatakan bahawa di seluruh Malaysia, kita kini dapati tahap keyakinan yang lebih besar di kalangan pekerja dan eksekutif dan Petronas telah menyumbang dalam cara yang agak besar dalam membina keyakinan itu," katanya.

Beliau berkata, loji LNG itu bukan saja membolehkan negara memperoleh sumber yang berharga daripada medan gas tulen tetapi juga gas berkaitan daripada pengeluaran minyak.

"Sebelum ini gas berkaitan dibuang begitu saja dan telah menyumbang kepada pencemaran alam sekitar. Kini gas ini telah dijadikan pendapatan tambahan bagi negara kerana ia juga dijadikan cecair oleh loji ini," katanya.

Dr Mahathir berkata, penemuan minyak dan gas di Malaysia datang pada masa yang paling tepat kerana rizab timah negara kehabisan dengan cepat, harga getah jatuh menjunam dan industri pembuatan belum lagi menggantikan komoditi itu sebagai enjin pertumbuhan.

"Pada 1973 krisis minyak pertama muncul. (Dengan) kos bahan api yang tinggi yang kita terpaksa menguatkuasakan ketika itu dan pulangan yang rendah daripada sumber pendapatan kita, masa depan kelihatan begitu suram bagi Malaysia (ketika itu).

"Kita tidak pernah percaya sebenarnya terdapat minyak dan gas di luar pantai Malaysia. Oleh itu kita amat murah hati dalam memberikan konsesi cari gali dan pengeluaran.

"Kita meraba-raba dan membuat silap, tidak memahami sebenarnya perniagaan minyak dan potensinya bagi Malaysia. Dan perniagaan minyak dunia telah dikuasai oleh syarikat multinasional yang besar, dikendalikan oleh orang besar yang menggerunkan kita. Kita malahan merasa serba kekurangan bila berunding dengan mereka," katanya.

Perdana Menteri berkata, ketakutan itulah yang menyebabkan Malaysia menubuhkan perbadanan minyak negaranya, Petronas dan hari ini syarikat ini telah dikenali di seluruh dunia.